



PEJABAT KETUA PENGARAH PENDIDIKAN MALAYSIA  
*Office of the Director General of Education Malaysia*  
PARAS 7 BLOK J PUSAT BANDAR DAMANSARA  
Level 7 Block J Damansara Town Centre  
50604 KUALA LUMPUR

Tel: 03-2586900  
Fax: 03-2535150

KP (BS) 8591/Jld.XVI (16)  
13 November 2000

Semua Pengarah Pendidikan Negeri

Y.Bhg. Dato'/Tuan/Puan,

***SURAT PEKELILING IKHTISAS BIL. 16/2000:***  
***Salah Laku Memasukkan Unsur Politik Dalam Soalan Peperiksaan/Ujian***  
***Di Sekolah Dan Perbuatan Menghasut/Meracuni Fikiran Pelajar Membenci Kerajaan***

Kementerian Pendidikan mendapati bahawa sejak akhir-akhir ini terdapat segelintir guru yang telah menunjukkan sikap dan perbuatan anti-kerajaan serta tidak profesional dalam profesi keguruan. Sikap dan perbuatan ini telah mencemarkan nama baik profesi keguruan khususnya dan Kementerian Pendidikan amnya.

2. Sikap dan perbuatan anti-kerajaan serta amalan tidak profesional itu termasuk:
  - 2.1 menyediakan soalan peperiksaan penggal dan ujian bulanan yang berbau politik;
  - 2.2 menghasut pelajar supaya membenci kerajaan yang memerintah;
  - 2.3 meracuni fikiran pelajar semasa proses pengajaran dan pembelajaran supaya memandang rendah pemimpin-pemimpin negara;
  - 2.4 mengadakan ceramah, perbincangan, dan perbahasan yang mempunyai unsur membenci serta anti-kerajaan;
  - 2.5 mempengaruhi pelajar sehingga menyebabkan pelajar melukis atau melakar bentuk-bentuk lukisan yang memberi maksud membenci atau menyindir tindakan atau dasar kerajaan;
  - 2.6 memperlihatkan dengan jelas ketaksuhan berpolitik anti-kerajaan dengan pelbagai cara baik secara langsung maupun tidak langsung sama ada berbentuk lisan atau tulisan, ataupun melalui perhimpunan mingguan, perbualan, ceramah di surau, semasa kaunseling dan sebagainya; dan
  - 2.7 melakukan apa-apa sahaja amalan dan perbuatan yang bertentangan dengan Etika Profesional Keguruan.

3. Sukacita diambil perhatian bahawa Ketua Setiausaha Negara dalam arahannya yang bertarikh 5 Ogos 1999 {Rujuk: PM (S) 11287 Jld. 3} telah membuat **larangan** penglibatan pegawai-pegawai kerajaan dalam politik sebagaimana tercatat dalam Peraturan 21, Peraturan Pegawai Awam (Kelakuan dan Tatatertib) 1993. Selain daripada itu, Ketua Setiausaha Negara juga telah mengingatkan semua pegawai kerajaan supaya

berpegang teguh kepada prinsip '**neutrality of the civil service**' dan memberikan sokongan taat setia yang tidak berbelah bagi kepada kerajaan yang memerintah.

4. Dalam arahan yang sama, Ketua Setiausaha Negara juga telah mengingatkan semua Ketua Jabatan agar **mengambil perhatian serius** terhadap larangan-larangan yang telah dibuat dan memastikan semua kakitangan awam memberi taat setia yang tidak berbelah bagi pada setiap masa dan ketika kepada Yang di-Pertuan Agong, Negara dan Kerajaan sebagaimana yang tercatat dalam Peraturan 4(1), Peraturan-Peraturan Pegawai Awam (Kelakuan dan Tatatertib) 1993.

5. Selain daripada itu, Ketua Pengarah Pendidikan Malaysia dalam Surat Pekeliling Ikhtisas Bil. 5/1999 bertarikh 11 Mei 1999 telah menegaskan bahawa semua kakitangan dan Pegawai Perkhidmatan Pendidikan **dilarang** terlibat dalam aktiviti anti-kerajaan. Pegawai-pegawai Perkhidmatan Pendidikan juga telah ditegah melakukan apa juga bentuk kegiatan berunsur politik, baik dalam pejabat, di kawasan sekolah ataupun dalam bilik darjah.

6. Bagi memastikan perbuatan-perbuatan dan salah laku yang dinyatakan di atas tidak berulang dan terus dihentikan, Y.Bhg. Dato'/Tuan/Puan dengan ini **diarah** supaya mengingatkan semua pengetua dan guru besar agar mematuhi arahan-arahan yang berikut:

- 6.1 Peraturan 4(1) dan Peraturan 21, Peraturan-Peraturan Pegawai Awam (Kelakuan dan tatatertib) 1993;
- 6.2 Arahan Ketua Setiausaha Negara bertarikh 5 Ogos 1999 {PM(S)11287 Jid. 3} yang bertajuk: 'Penglibatan Pegawai-Pegawai Kerajaan Dalam Politik',
- 6.3 Surat Pekeliling Ikhtisas Bil. 5/1999 bertarikh 11 Mei 1999 yang bertajuk: 'Larangan Terhadap Penglibatan Pegawai-pegawai Perkhidmatan Pendidikan, Staf Sokongan dan Murid Sekolah Dalam Kegiatan Politik Anti-Kerajaan.'
- 6.4 Surat Pekeliling Ikhtisas Bil. 3/1987 bertarikh 11 November 1987 yang bertajuk: 'Penyeliaan Pengajaran-Pembelajaran Di Dalam Kelas Oleh Pengetua/Guru Besar Sekolah; dan
- 6.5 Surat Pekeliling Ikhtisas Bil. 4/1986 bertarikh 13 Mac 1986 yang bertajuk: 'Panitia Mata Pelajaran'.

7. Selain daripada itu, pihak Y.Bhg. Dato'/Tuan/Puan juga hendaklah:

- 7.1 mengingatkan semua pengetua dan guru besar bahawa pengetua dan guru besar adalah '*accountable*' dan bertanggungjawab meluluskan soalan-soalan ujian dan peperiksaan di sekolah;
- 7.2 memastikan setiap sekolah mempunyai **Manual Prosedur Kerja** pengurusan kurikulum yang secara bertulis mengandungi tatacara pengurusan panitia serta prosedur dan peraturan peperiksaan dan penilaian;
- 7.3 menentukan bahawa soalan-soalan peperiksaan dan ujian di sekolah hanya boleh dikendalikan secara sah setelah ia **diluluskan** oleh Pengetua dan Guru Besar yang berkenaan; dan
- 7.4 mengawasi segala ceramah, ucapan dan aktiviti yang diadakan dalam kawasan sekolah serta pengajaran-pembelajaran guru dalam kelas yang boleh ditafsirkan sebagai berbau politik, menyebelahi mana-mana parti politik

ataupun unsur-unsur menentang kerajaan serta dasar-dasar kerajaan dan Kementerian Pendidikan.

8. Dengan ini adalah diingatkan kepada semua pengetua dan guru besar bahawa pada masa akan datang, jika berlaku lagi perkara-perkara negatif yang dinyatakan di atas di sesebuah sekolah baik dalam apa bentuk sekalipun, maka pihak yang bertanggungjawab dalam hal ini ialah **PENGETUA** dan **GURU BESAR** itu sendiri. Dalam hal ini, tindakan tatatertib bukan sahaja boleh diambil terhadap guru yang terlibat atau guru-guru berkenaan, tetapi tindakan tatatertib juga boleh diambil terhadap seseorang pengetua atau guru besar sekolah berkenaan kerana kelalaian menguatkuasakan peraturan yang telah ditetapkan.

9. Sila maklumkan kandungan surat pekeliling ini kepada semua pegawai di Jabatan Pendidikan Negeri, Pejabat Pendidikan Bahagian/Daerah, Pengetua/Guru Besra dan guru-guru di bawah pentadbiran Y.Bhg. Dato'/Tuan/Puan.

Sekian.

**"BERKHIDMAT UNTUK NEGARA"**



**DATU SERI DR. ABDUL SHUKOR ABDULLAH**  
Ketua Pengarah Pendidikan Malaysia

- s.k. 1. Y.B. Tan Sri Dato' Musa Bin Mohamad  
Menteri Pendidikan Malaysia
- 2. Y.B. Dato' Abdul Aziz Bin Shamsuddin  
Timbalan Menteri Pendidikan
- 3. Y.B. Dato' Hon Choon Kim  
Timbalan Menteri Pendidikan
- 4. Y.B. Dato' Mahadzir Bin Mohd Khir  
Setiausaha Parlimen Kementerian Pendidikan
- 5. Ketua Setiausaha Kementerian Pendidikan
- 6. Timbalan-Timbalan Ketua Setiausaha Kementerian Pendidikan
- 7. Timbalan-Timbalan Ketua Pengarah Pendidikan
- 8. Ketua-Ketua Bahagian Kementerian Pendidikan
- 9. Ketua Nazir Sekolah
- 10. Pegawai Perhubungan Awam